

# «Vitus Huonder n'è betg la culpa»

■ (rtr) Onn per onn perda la baselgia commembers perquai ch'els han avunda ed extreschan. La raschun n'è dentant betg l'investg Vitus Huonder cun sias opiniuns, è ses pledader Giuseppe Gracia persvas. Che Grischunas e Grischuns extreschian da la baselgia n'haja da far nagut cun la persuna che maina. Per Giuseppe Gracia èsi cler: «La gliעד extrescha da la baselgia, independent tgi ch'è a la testa. Er auters investgieus han da sa stentar cun extras – per part schizunt pli fitg che l'investgieu da Cuira.» E gea, gnanc il papa *Francestg* possa franar quest trend, anzi, cun lez haja quai schizunt dà dapli extras or da la baselgia che avant.

Sch'i avessia propi be da far cun la persuna, concret cun l'investg da Cuira Vitus Huonder, alura n'avessia la baselgia reformada dal Grischun gea betg da sa stentar cun il medem problem, concluda Gracia. «La raschun daco che la gliעד va or da la baselgia è per l'ina surconfessionala e per l'autra va ella sur ils cunfins ora.» Era l'Austria e la Germania hajan bleras extras.

Dir dentant concret tge che las raschuns èn na po el betg. Ina analisa detagliada manchia dal tuttafatg: «Nagin sto numnadain inditgar daco ch'el sorta da la baselgia. E natiralmain stuess er la baselgia esser pli activa e dumandar las raschuns», di Gracia. Quai ch'ha per consequenza ch'ins sa il mument simplamain mo far speculaziuns. E quellas èn vastas: uschia dettia per exempel da quels che dian che la baselgia saja memia gronda e memia birocratica: ils auters puspè ch'els carstgauns sajan ozendi memia fitg individualists, ch'els na dovrian betg pli la cuminanza e ch'els na veglian simplamain era betg pli pajar taglia per insatge ch'els gnanc dovrian.

## Adina dapli senza confessiun

Il 1970 avevan 0,4% dals Grischuns inditgà d'esser senza confessiun. Il 2013 èn quai tenor l'Uffizi federal da statistica gia 15% da la populaziun grischuna. E la cumpart da quels senza confessiun è creschida ils ultims onns vinavant constantamain: dapi il 2010 mintg'onn per prest 1%. Quai ch'è

dentant anc adina sut la media naziunala. Tge che las raschuns èn precis, na sa era betg *Cornelia Camichel Bromeis* dir. La decana da la baselgia reformada dal Grischun constatescha dentant che blers sortian da la baselgia cura ch'ils quints da taglia vegnian a chasa: «Nus avain in'unda d'extras cunzunt cura ch'i va per pajar la taglia da baselgia.» Blers hajan pli probabel il sentiment: «daco pajar per insatge ch'ins na dovra betg?». Impurtant saja perquai tant pli fitg da far attenta la gliעד tge che la baselgia fetschia tut per la cuminanza e per tge ch'ins duessia sustegnair ella.

Malgrà che la baselgia reformada e la baselgia catolica perdan mintg'onn prest 1% da lur commembers è la «chatscha sin olmas» nagin tema per ellas. Far reclama per persvader la gliעד d'entrar en baselgia, respectiv per ch'almain quels ch'èn anc commembers da la baselgia restian era vinavant quai, excludan tant *Cornelia Camichel Bromeis* sco er Giuseppe Gracia.

Empè da campagnas da placats è per la baselgia reformada dal Grischun pli impur-

tant l'inscunter direct: per exempel da far lavurs concretas ed investir las resursas per ils basegns da la gliעד che viva en las vischnancas. Pia er esser là preschent nua ch'i fa propi da basegns: per exempel sustegnair quels ch'han pers in carstgaun charezzà u quels ch'han ina malsogna betg curabla. «E quest agid da la baselgia reformada vegn era vis e respectà», concluda la decana *Cornelia Camichel Bromeis*. Impurtant saja natiralmain era qua da far ina buna communicaziun – per exempel via las medias.

Il pledader da l'investgieu da Cuira Giuseppe Gracia conceda dentant che fors stuess la baselgia catolica schon midar in zichel sia communicaziun ed adattar quella pli fitg al papa. Pia metter pli fitg misericordia en il center e lura pir la ductrina.

Midar la ductrina da la baselgia catolica per amur dals commembers, pia cun l'intenziun ch'els restian uschia lura plitost, respectiv ch'els turnian puspè, è tenor Giuseppe Gracia en mintga cas la fallada via. Il carstgaun stoppia sa midar e betg la baselgia. Tema d'esser ina giada sulets en la ba-

selgia n'han els dentant betg. Per la decana da la baselgia reformada dal Grischun n'è betg mo la situaziun betg uschè dramatica cun perder mintg'onn in mez pertschient dals commembers. Quai ch'ins na dastgia era betg emblidar: tar 500 extras dettia quai mintga giada 100 entradas tar la baselgia reformada dal Grischun. «E quai èn persunas ch'èn ord persvasiun en la baselgia. Persunas cun las qualas ins sa era lavurar bain», di *Cornelia Camichel Bromeis*.

Tge ch'ins na dastgia era betg emblidar, uschia Giuseppe Gracia. «La baselgia catolica è ina baselgia che viva e crescha incuntin: betg en l'Europa, cunzunt betg en il territori tudestg, persunter en l'America, en l'Africa ed en la China.»

Mintg'onn haja ella 14 milliuns dapli commembers uschia ch'el n'haja insumma betg tema per la baselgia catolica. Quai ch'ella stuess fors ina giada far è guardar daco ch'ella crescha uschè fitg en da quellas tiaras, e lura vesess ella fors era las raschuns da las extras qua en Svizra ed en il Grischun.



Onn per onn perda la baselgia commembers perquai ch'els han avunda ed extreschan. Tge èn las raschuns?